

اعلى جال اكتابة بالعربية ساهلة ماهلة
الحسن الحافي
المغرب

تلخيصة: ف هاذ الورقة غادي نعطي مقترحات كيفاش يمكن انطوروا الكتابة بالعربية باش تقدر اتساير العصر او ترجع قادرة اتكون ابحالها ابحال البوجاديات اديال العالم المعاصر اتسهل تنشار المعرفة او إوا التقدم او الاستقرار اديال المجتمع، عوض الوضعية اللي راها فيه اليوم اللي كتمنع أي قدرة للعامة باش تقرى او تفهم او اتطور المحادثة اديالها اليوماوية الشي اللي كيضعف التلاحم اديال المجتمع او كيهدد الاستمرارية اديالو.

هاذي اقرون انتابه ابن خلدون ف المقدمة المشهورة لكون اللسان المتداول ف العصر اديالو ماشي هو اللسان اديال مضر اللي مكتوب بيه القران حيث ايقول:

" ولغة حمير لغة أخرى مغايرة للغة مضر في الكثير من أوضاعها وتصاريقها و حركات إعرابها كما هي لغة العرب لعهدنا مع لغة مضر إلا أن العناية بلسان مضر من أجل الشريعة كما قلناه حمل ذلك على الاستنباط والاستقراء و ليس عندنا لهذا العهد ما يحملنا على مثل ذلك و يدعونا إليه."

إلا أنه كيلاحظ بأن الشي اللي ادفع لعرب يعتانيوا بلغة القران هو الحفاظ اعلى الشريعة بينما ما باناش ليه اعلاش الناس ف العهد اديالو غادي يهتموا باللسون المتداولة كما اهتموا بلسان مضر، هاذ الاستنتاج ماشي منطقي الى اخذينا بعين الاعتبار الوعي اللي كان عند بن خلدون بخصوص مقومات التحضر او اعلى راسها لسان امطور، الشي اللي ايجليني نستنتج بأنه اطلق هاذ الاستنتاج لتمويه رجال الدين باش ما ايهاجموهش او يعطيوه التيقار. فهو رغم ذلك بطريقة ذكية اطلب باش ايتم تحيين هاذ اللسان او تسهيل التلقي اديالة باش ايكونف متناول الأغلبية اديال الناس حيث ايقول ف هاذ المسألة ف المقدمة:

"و لعنا لو اعتنينا بهذا اللسان العربي لهذا العهد و استقرينا أحكامه نعتاض عن الحركات الإعرابية في دلالتها بأمر أخرى موحودة فيه تكون بها قوانين تخصصها. و لعلها تكون في أواخره على غير المنهاج الأول في لغة مضر فليست اللغات و ملكاتها مجانا. و لقد كان اللسان المضري مع اللسان الحميري بهذه المثابة و تغير عند مضر كثير من موضوعات اللسان الحميري و تصاريق كلماته."

اليوم المختصين ف اللسون اغلبيتهم كيعتارفوا بان الكتابة بالحروف اديال العربية فيها اُحمل زايد اعلى اللي كيكتب او صعوبة اعلى اللي كيقرأ الشي اللي مكتوب بيها كان باللسان اديال موزر اللي كيطلقوا اعليه "اللغة الفصحى" ولا أي لسان من اللسون الحية اللي اتفرعت اعليها ف البلدان اديال لعرب المختلفة اللي كيطلقوا اعليها " العاميات " ولا " اللهجات " ولا " الدريجات ". هاذ الحمل الزايد او هاذ الصعوبة جايين من الحركات او التنقاط او الاستثنائيات الكثيرة اللي كتميز الكتابة بهاذ الحروف. ف إلى كان هاذ التميز ف الماضي ما كيخلق حتى مشكل حيث الكتابة او القراءة كانوا محصورين عند طبقة امعينة من المجتمع اديال العرب خاصة الفقها او رجال الدين او السلطة، فالיום القراءة او الكتابة ايخص ايكونوا اميسرين لكل فرد ف المجتمع باش يتحقق الاستقرار او النمو او ايقّل خطر الفوضى او الانهيار الحضاري. هاذ الشي كيفرض يتعاود النظر ف هاذ الكتابة باش اتولي ساهلة او يقدر اعليها، ف اقرايا او ف اکتابا، كل واحد بمجهود مقبول ما اينقرش. ف احنا اليوم إوا ف حاجة، بدون تأخير، لتطوير لكتابة بهاذ الحروف اديال العربية إلى ابغينا انحافظوا اعلى هاذ الورث ابلا ما ايكون مانع للتقدم او للازدهار، أما الجمود او عدم المبادرة تحت مبررات عاطفية ولا تقديسية فما غادي غي تدفع المجتمع باش ايقلب اعلى احروف اجديدة من بين الشي اللي متداول ف العالم او بين الفعالية اديالو ف نشر القراءة او الكتابة بين كل افراد المجتمع كما مثلا دارت تركيا ملي اتخلات اعلى الحروف اديال العربية او اتبنات الحروف اللاتينية، اعلقاش المجتمع كيخضع لقوانين الطبيعة اللي تسمح ليه باش يستمر او ايدوم ماشي لاکراهات اللي تقضي اعليه وخی كيف ما كانت الركائز اللي واقفة اعليهم.

1- طلة اعلى تاريخ تطور احروف العربية

الحروف اديال العربية اللي كتستعملو اليوم ف الكتابة راه ما نزلوش من السماء، ولكن عرفوا تطور امع الوقت. الاختصاصيين ف هاذ المجال اللي كيبحثوا على الأصل اديال هاذ الحروف او كيفاش أوقع التطور اديالهم ف التاريخ بينوا انطلاقا من المخطوطات او النقوشات اللي بين يديهم أن الكتابة كانت ف اللول ابلا نقط ولا حركات، حتى القرن السابع الميلادي عاد ابدوا ايفكروا كيفاش ايطورو هاذ الكتابة باش اتقرا بسهولة او ما يوقعش التلباس عند

القاري ايخليه يقرى او يفهم الغلاط، بالخصوص القرآن الكريم اللي ولى ايشكل المرجع اديال الدولة اللي كبرت المساحة اديالها، فأى قراية مخالفة يقدر يترتب اعليها فهم مختلف او استنتاجات تقدر اتكون خطيرة ابحال مثلا (1) ما جا ف سورة التوبة : "إن الله بريء من المشركين و رسوله"، حيث كان اللي كيقرأها "و رسوله" بكسر الراء او كايين اللي كيقرأها بالفتحة او اكايين اللي بالضممة، الشي اللي كيغطي معنى مختلف اديال الجملة ف كل مرة حتى ان المعنى اديالها بكسر حرف الراء، بالرغم من محاولات تاويلية، ما اتقبلوهاش اغلبية رجال الدين حيث كتولي معطوفة ف نظرهم اعلى المشركين او كفروا كل من كيقرأ بهاذ الطريقة، فكيتحكى أن هاذ الآية كانت مور البني اديال النحو اديال العربية. هاذ القضايا اترتب اعليها ضرورة اتنجز وثيقة مكتوبة اتقرى بطريقة وحدة فين ما. فربما لهاذ السبب السياسي اللي خلى تطور الخط اديال العربية بالنسبة للقرآن يتعدد حسب الولاء لهاذ الدولة ولا لخرى. فف عهد العباسيين تم تدخل الحركات عبارة اعلى نقط (الفتحة: نقطة فوق الحرف، الكسرة: نقطة تحت الحرف، الضمة نقطة قدام الحرف، التنوين: جوج نقط حسب الحركة)، ولكن باش ايميزوا هاذ النقط اعلى النقاط الاصلية اديال الحروف كانوا كيكتبوا الحركات بلون مخالف للون اديال الحروف. هاذ الحل حتى هو ما اقدرش ايطول حيث كان كيرهق او مكلف او ما كيقاومش امع الوقت، تقدر الألوان تبهاك او امع الصغر اديالها يصعب التمييز بين نقطة الحركة او نقطة العجمية. هاذ الشي خلى المهتمين ايقبلوا اعلى حل اجديد، منهم الفراهيدي، حسب بعض المورخين (2)، من بعد قرن اقدر ايغير هاذ الطريقة او يستعمل خطوط بدل النقط (الفتحة رجعها ليف اصغير مايل فوق الحرف، الكسرة: ليف اصغير مايل تحت الحرف، الضمة: واو اصغير فوق الحرف، التنوين نفس الخط الحركة امعاود جوج مرات). نفس القصة امع الهمزة او الشدة (شوف (3)). هاذ الخط اعرف تطور حسب الحاجة اديال التحضر او انتشار القراية، اليوم عدد اكبير من المختصين او المهتمين بالقرايا او الكتابة ف العالم العربي كيشوفوا بأن هاذ الحالة اللي راه فيها الخط اديال العربية ما كيتماشاش امع العصر او كيشكل حاجز امام الانتشار اديال القراية او الكتابة ف المجتمعات العربية او كيمنع بالتالي هاذ المجتمعات باش تتطور او تتقدم ابحال كاع الشعوب او اللّمْ، الشي اللي يفرض التفكير ف تطويرو من اجديد باش اكون ف متناول كل فرد من المجتمع اychفزو اعلى القراية او

الكتابة بالشئ الذي يرجع الى المجتمع بالتقدم او الازدهار. ف هاذ الاتجاه غادي نطرح هنا مقترحات كيفاش يمكن اكون خط مقروء ابلا معرفة مسبقة باللغة، يكفي اكون الواحد هجاي طبعا ما كندعش انني كنقدم مقترحات نهائية هي الحل لهاد الأزمة ولكن مبادرة ف اطريق الوعي بهاذ القضية الذي يقدر اشارك فيها كل مفكر مبدع تعطيف الأخير نتيجة يتبناها المجتمع او يعتمدها من اجل الأهداف الذي ذكرت فوق.

2- من اجل خط ابلا حركات

اقبل ما نعطي المقترحات كنعتراف باللي كاين مقترحات كثيرة اللي ابدات تظهر هادي اكثر من قرن لكن للأسف ما القاتش الاستجابة من طرف المجتمعات العربية، السبب اديال هاذ الرفض هو ماشي اعلقاش هاذ الاقتراحات ماشي ف المستوى و لكن لأن ابحال هاذ النقاش كيتأدلج بسهولة او كتوجهوا القوى المحافظة الذي كتسيطر على المجتمعات العربية او كيخوفها أي تطور. ولكن هاذ الحالة ما يمكنش تستامر حتى تقضي على هاذ المجتمعات او اتسبب الانقراض اديالها، لابد ايجي شي انهيار الذي اتعيق فيه ابهاذ الدهليز الذي راها محشية فيه او اتشوف خيط النور الذي ايوجها لمستقبل تلقى فيه القيمة الذي فقدتها او المكانة الذي تستحقها بين اللمم او تتجنب الاخطار الذي اتدور بيها. فمن اجل ابيان هاذ الخيط اديال النور كنساهم بهاذ المقترحات.

- الحركات القصيرة:

هاذ الحركات المعروفة بالفتحة، الضمة او الكسرة ف ابحال "كُتِبَ" يمكن نتخلوا عليهم او ايرجعو احروف : ا، و، ي، الذي كنستعملوهم ف "المد" او كنسميوهم احروف العلة ف هاذ الحالة "كُتِبَ" غادي اتكتب "كوتيبا"، ف هاذ الحالة ما نحتاجش الشكل باش نقرى، الكلمة مشكولة أصلا او ما غاديش تتخلط امع شي كلمة أخرى ابحال "كُتِبَ" ولا "كُتِبَ"، بالإضافة لهاد السهولة ف القراءة كاين اربيح الوقت واقتصاد ف الطاقة الى قارننا الكتبة اديال هاذ الكلمة باليد ولا بالكومبيوتر بالطريقة الحالية الذي كتتطلب وقت اوجهد باش ايحط الواحد الحركات فوق ولا تحت الحروف. هاذ المقترح بطبيعة اتكلموا عليه عدد من المختصين ف المجال.

- الحركات الطويلة:

هاذ الحركات هي اللي معروفة ب "حركات المد" اللي هي "ا، و، ي" ف ابحال " فيما كانوا"، كاين حتى ف هاذ الجانب اقتراحات اكيرة ف تاحارافيت (la littérature) ولكن اهنّا غادي نعطي مقترحات اجديدة. هاذ المقترحات كتدمج الهمزة امع احروف العلة اللي كيغطي صوت اطويل حسب الحرف، امع الهمزة غادي اتكون دايمًا مكتوبة اعلّى حرف اليا: "ئ". هاذ الطريقة غادي تعطينا اكلاثة اديال الحروف صوتاوية اللي كتعبر اعلّى الحركات الطويلة اللي هي "ئا، ئو، ئب"، هاذ الحروف اللي إلى ضميناها لحرف عجاوي غادي اتجرو امعاها او يعطينا الحركة الطويلة ابحال مثلاً "بئا، بئو، بئب" اللي اليوم كنكتبوها "با، بو، بب"، بهاذ الطريقة الجملة اللي أعطيت فوق كمثل: "فيما كانوا" غادي اتكتب "فئيمًا كئانئو".

- الهمزة:

الهمزة هي الحرف اللي الخط اديال العربية ما اتوقفش ف التطويع اديالها او التطور اديال اكتباتو اعرف تعويم كيخلي المعلمين اديال العربية حايرين ف الصورة اللي ايخص ايكون فيه او هما كيدونوا الأفكار اديالهم، حتى انني اليوم نقدر انأكد أن أي واحد امعلم ف العربية إلا و كيغلط مرة مرة ف الكتابة اديال هاذ الحرف؛ واش همزة قطع ولا وصل؟ واش كتكتب اعلّى السطر ولا اعلّى الليف ولا اعلّى اليا؟ فباش نخرجوا من هاذ المعضلة ايخص اتكون عند هاذ الحرف تصويرة وحدة إلى كان منطوق، ف هاذ الاتجاه كنقتارح يتكتب دايمًا همزة فوق الليف ابحال هاذ الشكل "أ" باش يتفرق اعلّى اللي كيجر الحروف المنطوقة اللي كما اقترحت منقبل كيكتكتب اعلّى اليا ابحال "ئ". مثلاً ف عربية مضر الكلمات "سأل، سئل، مسؤول" يتكتبوا بالطريقة اللي منبعد: "سأألا، سوأيلا، ماسأئول". لحسن الحظ العربية المغربية قدرات تتغلب اعلّى التّجيفة اللي كيخلقها النطق بهاذ الحرف الصامت ف وسط الكلمة او اللّخر اديالها او حتى ف الغالب ف اللول اديالها إلا ف اقليل اديال الحالات او عوضها بالواو ولا اليا ولا حتى اللام ف اللول اديال الكلمة ولا مدد بيها الحرف المنطوق اللي اقبلها ولا الغاها خاصة ف اللّخر ابحال مثلاً "سأل" ف المغربية هي "سؤل"، "مائل" ف المغربية "مايل"، "قرآن، شيء" ف المغربية "قران، شي"، ماء ف المغربية "ما"،

"إيمان، أمانة" ف المغربية " ليمان، لمانة"، بطبيعة الحال التعريب اللي اتفرض على المغاربة منبعد الاستقلال افرض اعليهم ايرجعو اينطقوا هاذ الحرف بَزَز ف بزاف اديال الكلام او المصطلحات ضد الطبيعة البيولوجيا اللي كتوجه التطور اللساني اديالهم بالشئ اللي يحترم قوانين الطبيعة كمّا ف كل المجالات، حيث اللسان طبيعة ماشي حيلة، كيخضع لمبدأ ما قل من الفَعْلَا (principe de moindre action) أو اكراه ما يمكن اكون غي اموقت كيزول ملي اتزول لسباب اديال هاذ الاكراه.

- السكون:

السكون ف الخط اللي امرسم اليوم كيتعبرّ اعليه ب دويرة فوق الحرف ابحال "ب"، هاذ الدويرة كيقولوا المختصين أن الأصل اديالها هو الصفر حيث كيغني ما كاينش الحركة فوق الحرف باش يتميز اعلى الحركات لخرين، اهنا إوا بما أننا اتخلينا اعلى هاذ الحركات او عوضناهم بحروف، فأطوماتيكيا غادي يبقى الحرف المعني ف الكلمة ابلا حتى شي حاجة زايدة منبعدو ابحال مثلا "مَعلوم" غادي اتكتب " ماعلُوم".

ف بعض المرات ف عربية مضر كيتم نطق حروف الحركة بالسكون ابحال مثلا ف وسط الكلمة: " لُون، بَيْن، شَأْن،..." ف هاذ الحالة يمكن يتكتبوا ابحال " لاون، باين، شَأْن،..."، لحسن الحظ كذلك اهنا ف المغربية هاذ الخنقة اديال نطق هاذ الحروف تم التجاوز اديالها ب حذف السكون اعلى حرف الحركة اودمجو امع الحرف اللي قبلو باش ايجرو، الكلمات اللي اقبل كتتطق إوا " لُون، بَيْن، شَأْن،..." أما الى كان حرف الحركة ساكن ف اللخر اديال الكلمة او سابقوا حرف ساكن ابحال " جَرُو، مَشْي، مَرء،..."، اهنا لابد ما يتضاف شي رمز ف اللخر اديال الكلمة باش يتفهم بأن الحرف المنطوق اقبل حرف الحركة راه ساكن او هاذ التالي ايخص يتتطق بالسكون كذلك، كنقتراح اهنا باش تكمل الكلمة بالهمزة اعلى اليا او نكتبوا الكلمات اللي اذكرت ابحال " جارو، ماشيئ،"، بالنسبة للكلمة اللخرة : "مرء" اللي فيها الهمزة يمكن انحايدوا الهمزة التالية اعلى السطر اونكتبوا فقط "مارأ" حيث اهنا ما كاينش الغموض حركة الفتحة كتكتب بالليف ابلا همزة فوق كما اقترحت منقبل. اهنا كذلك ف المغربية ف الغالب كيتم دمج الحرف الساكت امع الحرف اللي قبلو او كيجرو بالمد ابحال مثلا

: " العَفُو " كتنتطق " لاعفُو"، "حَلُو" ف المغربية "احلُو"، "جَرِي" ف المغربية "اجرِي". ف الكلمة اللخرا "اجرِي" كاين السكون ف اللول اديال الكلمة، اهنا كقاعدة عامة فوقاش ما كان السكون ف اللول اديال الكلمة غادي يسبقوا حرف الليف حيث كيتنتطق اخفيف.

- التنوين

السكون ف اللخر اديال الكلمة ما كاينش ف عربية مضر بالنسبة للسموات ولكن كيتعوض بالتنوين الى كانت السمية نكرة، ولكن ف المغربية التنوين ما كاينش ف ابلصتو ديما كاين السكون إلا ف حالات ابحال : "شكرًا، عفواً، أبدأً..." ف هاذ الحالة النون اديال التنوين ايخص يتكتب ابحال : "شوكران، عافوان، أبادان...". التنوين كيخلينا نتكلموا اعلى لمعرّف، بالنسبة للمغربية ايخص التمييز بين الحالات؛ ملي اتكون السمية تبدا بالسكون ابحال "امرئًا، اخلئًا، اقلام، اهوا..." ف هاذ الحالة السمية امعرفة غادي يتزاد ليها لام مفتوحة ف اللول ابحال " لامرًا، لاخلئًا، لاقلام، لاهوا.." اما إلى كانت كتبدا بالسكون ولكن اعلى حرف كيولي مشدود امع اللام ابحال مثلا: " اسما، ادوا، اشعار..."، اهنا ف الحالة لمعرفة كيتعاود الحرف المشدود جوج مرات ابحال : "اسسما، اددوا، اششعار"، ام الحالات اللي ما كتبدش بالسكون فكتخضع لنفس القاعدة اللي كاينة اليوم ف العربية اديال مضر يعني يتزاد للكلمة "ال" الشمسية ولا القمرية ابحال " نثار، مناء، ..." كترجع ف حالة التعريف " النَّار، المَاء، ...".

- الشدّة:

هاذ الحركة اتزادت باش اتعبر ف النطق اعلى تكرار نفس الحرف جوج مرات متابعين، اللول ساكن او الجاوج عندو حركة، ابحال : " كَبُور" اللي هي ف النطق كتقرا "كَبُور". اهنا يتعاود يتكتب الحرف احسن ما يقطع الواحد او يرجع باش ايحط حركة الشدة فوق الحرف، من بين لمزيات اديال هاذ التطويرف الكتابة، باليد كيربّح الوقت او ايسر لكتابة او كينقص من المجهود اديال الشكل، اما بالنسبة للكتابة اعلى

الحصوص (computer) فكيوفر الطاقة او كينقص من الحجم اديال الفيشة
(fichier) ف التخزين.

3- اعلى جال خط ابلا تنقاط:

كمّا كتطرح الحركات مشكل، كذلك التنقيط كي طرح نفس المشكل بل اكثر خطورة حيث إلى اتنسأت ولا اتزادت نقطة ف غير المكان اديالها الصوت كيتغر او المعنى كيضيع او الرسالة كتوصل مغلوطة او النتيجة تقدر اتكون كارثية او احنا اليوم ف عصر اللي كلشي كيندار اعلى بعد، عصر التواصل اللي ايخص فيه الغلاط ايكون ف الحد التحتاني بحيث ما يأتثرش اعلى النتيجة اديال المخرَج. فمثلا "أخَص" ماشي هي "أخَص" ف على اتضافت النقطة ولا اتحايدت يمكن توقع كارثة كمّا ف هاذ الحكاية اديال الخليفة الاموي سليمان بن عبد الملك اللي كتگول أنه اكتب إلى ابن حزم أمير المدينة (3):

"أن أخص من قبلك من المُختئين" فوقعت النقطة من الكاتب اعلى الحاء؟ (ولا اتزورت المراسلة ف الطريق منبعد) فقراها: "أخص" من الخصاء لا من الإحصاء فدعا ابن حزم بهم وخصاه."

ولا مثلا الجملة ابحال : "إن هذا وعد، إذا جاءك بشعره فافئله ببديك و ادفعه للاحتراف" اللي يقدر أي واحد بسبب عدم الانتباه ولا بشكل متعمد ايرجع هاذ الجملة كما منبعد : "إن هذا وعد، إذا جاءك فافئله و ادفعه للاحتراق" فقط نقطة فوق "العين" اونقطة زائدة فوق "الف"، او ها السيد من وعد بمستقبل زين، ارجع وعد او ايخصوا يتقتل او يتحرق...

فباش يمكن اتكون عندنا اكتابة واضحة او قادرة توصل فين ما ف الوقت او لفضا ابلا ما اتكون حتى شي إمكانية يتحرف المعنى اديال الرسالة اللي كتضمنها، لا بد ما يتعاود النظر ف التنقاط كذلك او اتميز الحروف اعلى بعضها بعض ابلا حتى شي تضبُّب. ف هاذ الاتجاه كنقدم المقترح اللي منبعد:

لحروف اليوم	المقترح
ا	.ا.
ب	ب
ت ة	تلا
ث	تلك
ج ج	ج.ج
ح ح	ح.ح
خ خ	خ.خ
د	.د.
ذ	ذ
ر	ر
ز	ز
ط	.ط.
ظ	ظ
ك ك	ك ...
ل ل	ل.ل
م م	م.م
ن ن	ن.ن
ص ص	ص.ص
ض ض	ض.ض
ع ع ع	ع.ع.ع
غ غ غ	غ.غ.غ
ف	ف
ق ق	ق...
س س	س.س
ش ش	ش...
ه ه ه	ه.ه.ه
و	و
ي ي	ي.ي
أ أ	أ

4- لمونث او لمذكر

التونث او التذكوريت ف العربية اصعب ف القواعد اديالو، ف إلى ما كانتش النّا المربوطة ف اللخر ولا الليف مقصورة ولا الليف او الهمزة ف اللخر...، كيصعاب يعرف الواحد واش السمية اللي بين يديه واش ايخص اتونث ولا اتذوكر، ابحال مثلا "الشمس، النار، الضو، الباب...". المشكل ف العربية هو ضروري الواحد يعرف النوع اديال السمية باش يستعمل هاذ السميات بشكل اصحيح ف اكلامو ولا مكتوبو، حيث ف الفعل و لا ف الصفة و لا ف الإشارة او لا غيرهم كيتغير المنطوق او المكتوب حسب نوع السمية ف مثلا كيتقال " الشمس حارقة" ماشي "الشمس حارق"، او كيتقال "الضو شاعل" ماشي "الضو شاعلة" عكس مثلا اللسون اللاتينية ابحال الفرانساوية ولا النكليزية اللي النوع ما يأتثرش ف المنطوق اديال الجملة او ف الغالب حتى ف المكتوب. ف باش نتغلبوا اعلى هاذ المعضلة كنقتارح الشي اللي منبعده:

- بالنسبة للمونث اللي كيكمل بالتا مربوطة ايخص اكون عندهم نفس الكتابة، كايوالي ب "الها" ما كتنتطقش ابحال "امرئاه (امراة)، كوراه (كرة)، حاملاه (حملة)، حايباه (حية)..."

- اللي ايسليوا بالليف او الهمزة ولا بالليف مقصورة ابحال "حمراء، صحراء، ذكرى، بلوى..." اهنا بالنسبة للعربية المغربية الهمزة ف اللخر ما كتنتطقش او الكلمات اللي اذكرت كلها كتوالي بالفتحة ممدودة ابحال " حامرئاه، صاهرئاه، ذيكرائاه، بالوئاه" اهنا كذلك كنقتارح يتضاف حرف الها ف اللخر باش ايبين التوونيثة اديال السمية ابلا ما يتنطق اونكتبو " حامرئاه، صاهرئاه، ذيكرائاه، بالوئاه...". ايخص التمييز اهنا امع السميات اللي كتكمل بالها منطوقة ابحال " الله، الجاه،" ف هاذ السميات الها اصلية إلى ما اتنتقتش، الكلمة كتفقد المعنى اديالها، ف المغربية هاد الكلمات اقلال او ساهل التمييز اديالهم.

- أما بالنسبة للسميات المونثة اللي ماشي من هاذ النواع اللي اذكرت ابحال "الشمس، النار، النفس، الروح، العين..." ف اهنا كذلك ف يمكن يتضاف ليها حرف "الها"

ف اللخر ابلا ما يتنطق اويتكتبوا ابحال " الششامسه، الننأره، الننافسه، الررئوحه،
العائنه،..."

بهاذا الاقتراح غادي اتكون كل اسمية امونثة كتكمل بحرف "الها" ف اللخر اديالها ف الكتابة
ابلا ما يتنطق ف القراية او يسهال اعلى اللي باغي يتعلم العربية يتعرف ف الكتبة بسهولة
اعلى السمية واش مونثة ولا امذكرة او يتصرف انطلاقا من هاذ التمييز ف التعبير بشكل
اصحيح باللسان المغربي ولا بالعربية اديال موزر. اهنا لا بد ما انشير ف هاذ التوحيد اللي
كنفتارح بأن حرف "الها" اللي كيرمز للمونث كيتصرف دايمًا لحرف "التا" ملي يتصل بيه
ضمير ف الحالات الجوج اللولى، بينما كيتحذف ف الحالة الثالثة إلى الصق فيه ضمير. هاذ
الشي معمول بيه اليوم بالنسبة للسميات اللي كيكملوا بالتا مربوطة ولا الليف.

السمية	امع الضمير اديال المتكلم	امع الضمير اديال المخاطب
كوره (كُرة)	كوراتئي (كرتي)	كوراتاك (كرتك)
ذيكراه (ذكرى)	ذيكرائي (ذكراي)	ذيكرايئاتاك (ذكرياتك)
شامسه (شمس)	شامسئي (شمسي)	شامساك (شمسك)
نافسه (نفس)	نافسئي (نفسي)	نافساك (نفسك)
رئوحه	رئوحنئي (روحي)	رئوحاك (روحك)

المراجع

1 <https://islamweb.net/ar/library/index.php?page=bookcontents>

[&idfrom=1004&idto=1004&bk_no=203&ID=1013](https://islamweb.net/ar/library/index.php?page=bookcontents&idfrom=1004&idto=1004&bk_no=203&ID=1013)

2 <https://www.marefa.org/> الأجدية العربية

3 "تاريخ الكتابة العربية" علي إبراهيم محمد، دار المشرق العربي

https://drive.uqu.edu.sa/_/colarab_lg/files/ المكتبة 20% الرقمية/البحر

ث 20% العلمية/أعضاء 20% هيئة 20% التدريس/علي 20% إبراهيم 20% محمد/تاريخ

20% الكتابة 20% العربية 20% د 20% علي 20% إبراهيم 20% محمد.pdf